

Impissamaints pella votaziun dals 27 settember 2020

Nossas valladas e cuntradas alpinas vegnan stimadas dad indigens ed amo daplü da noss giasts. Giasts chi frequentan là lur temp liber e chi giodan üna cuntrada alpina chi cumpiglia sper las muntognas eir prada e pas-chüras. Per cha quai resta eir in avegnir uschea esa indispensabel cha quistas cuntradas vegnan cultivadas e chüradas. Daspö tschientiners vain quista lavur fatta dals paur da muntogna. Mincha prümavaira affidan pauras e paur lur muaglia, lur basa d'existenza e lur possess, a la pastriglia chi tilla perchüra e chüra d'ürant ils mais da stà. Eir d'ürant l'alpagiada nu's lascha evitar chi dà bes-chas chi as ferischan, chi cupichan, chi uostan, chi survegnan üna tös-chantada e bler oter plü. L'agricultura da muntogna viva cun e da la natüra. Pro quella toccan eir bes-chas rapazas, eir da quai as sun pauras e paur consciaints - bes-chas chi giodan üna protecziun particulara. La protecziun nu das-cha però ir a don e cuost da las famiglias da paur e da lur möd d'alpagiar chi ha fermas ragischs e chi'd es ün elemaint indispensabel per lur manaschis. La ledscha da chatscha federala prevezza da trar masüras preventivas. La valütaziun cura cha quai es il cas nun es i'ls mans dals paur, eir scha quels sun confruntats directamaing cullas bes-chas feridas o coppadas tras bes-chas rapazas. Ma eir els han il dret da gnir dudits, da gnir tuts serius e da surgnir il respet per lur lavur. Dapertuot ingio cha l'uman fa interenziuns illa natüra daja ün dischequiber. Las differentas pretaisas ed aspettativas davart da la società s-chaffischan conflicts d'interess. Nossas ledschas e noss uordens sun ils instrumaints per gnir a bröch cun quellas sfidas. La populaziun agricula, chi pissera tanter oter ch'eir valladas alpinas giò'd via nu mouran, merita il sustegn e l'incletta da quellas bleras persunas chi tillas giodan. Quist sustegn as lascha eir exprimer tras l'acconsentimaint a la ledscha da chatscha federala.

Aita Zanetti, grond cusgliera Suot Tasna, Sent